

Hesus, e Mediadó di e Aliansa Nobo

Les 8 di kuartaal 1, aña 2022

Les a pa e siman aki:

Heb. 7:11-19; Heb. 8:10-12; Jer. 31:31-34; Heb. 8:1-6; Eks. 24:1-8; Ezek. 36:26, 27.

TEKSTO PRINSIPAL:

" Ma awor El a optené un sirbishi mas ekselente, komo ku E ta tambe e Mediador di un mihó aliansa, kual a wòrdu stablesí riba mihó promesanan" (Hebreo 8:6, Beibel Santu).

Hesus, e Mediadó di e Aliansa Nobo

sabbat, 12-02-2022

Bibando un bida perfekto, i despeus muri den na nos lugá, Hesus a media un aliansa nobo, mas mihó entre nos i Dios. Pa medio di Su morto, Hesus a kanselá e kastigu di morto ku nos pikánan tabata eksigí i a hasi e aliansa nobo posibel.

E bèrdat akí ta wòrdu spliká den Hebreo 10:5-10, kual ta identifika Hesus komo Esun ku a manifestá e obediensia perfekto ku e aliansa ta rekerí. E ta referí na Salmo 40, originalmente referiendo na David su deseo pa someté obediensia total na Dios: " 'Ata, mi ta bin; den e ròl di e buki ta pará skirbí tokante di mi; Pa hasi Bo boluntad, O mi Dios, ta un delisia pa mi; Bo Leí ta den mi kurason" (Sal. 40:7, 8). E Salmo akí a ekspresá e kondishon di Dios Su aliansa ku Israel: un obediensia ku tabata un delisia i un lei ku tabata skirbí den nan kurason (Deut. 6:4-6). Pero loke David solamente por a deseá di hasi, Hesus a logra.

Pa Pablo, e Salmo akí tabata rekerí nifikashon spesial ku e inkarnashon di Hesus. Hesus a personifiká e obediensia di e aliansa nobo. E ta nos ehempel. Nos a wòrdu salbá, no solamente pa motibu di Su morto pero tambe pa motibu di Su obediensia perfekto.

Studia e lès di e siman akí pa prepará pa Sabat, 19 di febrüari.

E Nesesidat di un Aliansa Nobo

djadumingu, 13-02-2022

Les Hebreo 7:11-19. Di kon tabatin mester di un aliansa nobo?

Segun Hebreo, e echo ku Hesus a wòrdu skohí pa ta saserdote segun e ordu di Melkisedek tabata impliká ku un aliansa nobo a wòrdu inougurá. E aliansa bieu a wordu duná riba base di e saserdosio levítiko (Heb. 7:11, Beibel Santu). E saserdotenan levítiko tabata funshoná komo mediadornan entre Dios i Israel, i e lei tabata eskluí tur otro hende for di e saserdosio. E outor ta konkluí bisando, e ora ei, ku un kambio di saserdosio ta impliká un kambio di e lei di e saserdosio, meskos ku e kambio di e aliansa (Heb. 7:12, 18, 19).

E problema ku e aliansa bieu tabata ku e no por a profee perfekshon (Heb. 7:11). Pablo ta papiando di e saserdosio levítiko i su ministerio (sakrifisionan, fiestanan, ets.). E sakrifisionan di animal ofres'é pa medio di nan no tabata por a proveé limpiesa bèrdadero i total di piká, ni aksesu na Dios (Heb. 10:1-4; Heb. 9:13, 14; Heb. 10:19-23).

E echo di ku un aliansa nobo tabata nesesario no ta nifiká ku Dios no tabata hustu ku Israel ora ku El a duna nan e aliansa bieu. E ministerio levítiko i e servisionan di e tabernakel tabata diseñá pa protehá nan for di adolatria i tambe pa muestra nan na Hesus Su futuro ministerio. Hebreo ta enfatisá ku e sakrifisionan tabata " un sombra di e bon kosnan ku ta bin" (Heb. 10:1, Beibel Santu).

Mustrando nan na Hesus, e sakrifisionan mester a yuda e hendenan pone nan speransa i fe den "e lamchi di Dios ku ta kita piká di mundu" (Huan 1:29, Beibel Santu; kompará ku Isaías 53). Esaki ta e mesun punto ku Pablo ta hasi ora ku e ta bisa ku e lei tabata "nos tutor pa guia nos na Cristo, pa nos por wòrdu hustifiká pa medio di fe" (Gal. 3:24, Beibel Santu) òf ku "Cristo ta e fin di lei pa hustisia na tur esnan ku ta kere"(Rom. 10:4, Beibel Santu).

Den otro palabra, asta e Dies Mandamentunan, pa bon i perfekto ku nan ta, no por proveé salbashon (Rom. 3:20-28, Rom. 7:12-14). Nan ta provee un standart perfekto di hustisia, pero nan no ta proveé hustisia, meskos ku wak den un splil no por kita e ploinan di edat. Pa hustisia perfekto, nos tin mester di Hesus komo nos Supliente.

Di kon e lei no por salba nos? Finalmente si nos warda tur e mandamentunan, i warda nan bon, asta sin hasi niun eror di kon esei lo no por salba nos?

Nobo i Renobá

djaluna, 14-02-2022

Kompará Hebreo 8:10-12 ku Deuteronomio 6:4-6, Deuteronomio 30:11-14, i Jeremías 31:31-34. Kiko esaki ta siña nos tokante di e naturalesa di e aliansa nobo?

E promesa di un aliansa nobo den Hebreo ta referí bèk na Jeremías. Segun Jeremias, Dios Su promesa di un aliansa nobo tabata, de echo, un renobashon di e aliansa ku El a traha promé ku Israel pa medio di Moisés (Jer. 31:31-34). Hende por argumentá, e or'eí, ku Jeremias 31 no tabata papia direktamente di un aliansa

"nobo" pero un "renobamentu" di e alisa original ku Israel. De echo, e palabra hebreo pa nobo, hadashah, por tin tantu e sentido di "renobá" i "kompletamente nobo."

E problema ku e aliansa bieu tabata ku e hendenan a kibr'é (Heb. 8:8, 9). E aliansa no tabata robes; e hendenan sí. Si Israel lo a mira dor di e símbolonan di e Mesías ku tabata pa bini i a pone nan fe den djE, e aliansa lo no a wòrdu kibrá. Tòg, pa ta hustu, tabatin hopi kreyente atraves di e historia di e israelitanan den kua e propósitonan di e aliansa a wòrdu kumplí i ku tabatin e lei den nan kurason (Sal. 37:31, Sal. 40:8, Sal. 119:11, Isa. 51:7). Mientras e aliansa nobo ta un renobashon di e aliansa bieu, tin sentido den e echo ku realmente e ta nobo. Jeremías su promesa di un "alianza nobo" no solamente a vishoná un renobamentu di e kondishonnan ku tabata eksistí promé ku e eksilio, kual a wòrdu kibrá i renobá varios bia pasobra e nashon a kai varios bia den apostasía. I ta p'esei e hendenan simplemente no tabata dispuesto pa mantené nan parti den e aliansa ku Dios (Jer. 13:23).

Pues, Dios a primintí pa hasi un "kos nobo" (Jer. 31:22). E aliansa lo no ta manera e aliansa ku Dios a traha "ku nan tatanan" (Jer. 31:32). Pa motibu di e falta di fieldat di e pueblo, e promesanan di Dios hasí bou di e aliansa di Moisés nunca a wòrdu kumplí. Awor, den birtut di e garantía duná pa e Yu (Heb. 7:22), Dios lo kumpli ku e propósitonan di Su aliansa. Dios no a kambia Su lei ni a baha Su standartenan; na lugá di esei, El a manda Su Yu komo un garantía di e promesanan di aliansa (Heb. 7:22, Heb. 6:18-20). Esaki ta e motibu pa kiko e aliansa akí no tin maldishon. E tin solamente bendishon pasobra Hesus a kumpli kuné perfektamente.

Les 2 Timoteonan 2:13. Kiko nos por siña for di Dios Su fieldat na Su pueblo i na Su plannan mientras nos ta konsiderá nos relashon ku otronan i nos plannan?

E Aliansa Nobo Tin un Mihó Mediadó

djammers, 15-02-2022

Les a Hebreo 8:1-6. Di kon Hesus ta un mihó Mediadó di e aliansa?

E término griego mesites (mediadó) ta derivá for di mesos ("meimei") i ta muestra na esun ku ta papia òf ta para meimei. E tabata un término tekniko ku tabata referí na un persona ku tabata kumpli ku un òf mas di e siguiente funshonnan: (1) un árbitro entre dos òf mas partido, (2) un negoshadó òf un agente di negoshi, (3) un testigu den e sentido legal di e palabra, òf (4) unu ku ta para bòrg, pues ku ta garantisá ehekushon di un akuerdo.

E término ingles "mediadó" ta un tradukshon muchu limitá pa mesités den hebreo pasobra e ta enfoká solamente riba e promé dos òf tres usonan di e término griego. Sinembargo, Hebreo ta enfatisá e di kuater funshon. Hesus no ta wòrdu konsebí komo "mediadó" den e sentido di ku E ta resolvé un disputa entre e Tata i sernan humano òf komo un hasidó di pas ku ta rekonsiliá partidonan den desafekshon òf komo un testigu ku ta sertifiká e eksistensia di un kontrato òf su satisfakshon. Pero, manera Hebreo ta splika, Hesus ta e garantía (of bòrg) di e aliansa nobo (Heb. 7:22). Den hebreo, e término "mediadó" ta ekivalente na "garantía". E ta garantisá ku e promesanan di aliansa lo keda kumplí.

Kristu Su morto ta hasi e institushon di e aliansa nobo posibel pasobra e ta satisfasé e demandanan di e promé aliansa ku Israel, ku a wòrdu kibrá (Heb. 9:15-22). Den e sentido akí, Hesus ta e garantía ku a tuma riba Su mes tur e obligashonnan legal ku a wòrdu kibrá. Den otro palabra, Hesus Su eksaltashon den shelu ta garantisá ku Dios Su promesanan na sernan humano lo keda kumplí (Heb. 6:19, 20). Hesus ta garantisá e aliansa pasobra El a muestra ku Dios Su promesanan ta bèrdadero. Resusitando Hesus i lagand'E sinta na Su man drechi, e Tata a muestra ku E lo resusitá nos i trese nos serka djE.

Hesus ta un Mediadó mas mihó ku Moisés pasobra E ta ministrá den e santuario selestial i a ofresé Su mes komo un sakrifisio perfekto pa nos (Heb. 8:1-5, Heb. 10:5-10). Moisés su kara tabata reflehá e gloria di Dios (Eks. 34:29-35), pero Hesus ta e gloria di Dios (Heb. 1:3, Huan 1:14). Moisés a papia ku Dios kara kara (Eks. 33: 11), pero Hesus ta Dios Su Palabra (Heb. 4:12, 13; Huan 1:1-3, 14).

Si, Kristu a satisfasé e demandanan di e aliansa pa obediensia. Den e kuadro akí, kiko ta e ròl di obediensia den nos bida, i di kon ainda e ta asina importante?

E Aliansa Nobo Tin Mihó Promesananan

djarason, 16-02-2022

Nos por wòrdu tentá pa pensa ku e aliansa tin "mihó promesanan" den e sentido di ku e tin rekompensanan mas grandi ku e aliansa bieu tabatin (un kas selestial, bida eterno, ets.). E bèrdat ta ku Dios a ofresé e mesun rekompensanan na e kreyentenan den Tèstamènt Bieu manera El a ofresé na nos (lesa Heb. 11:10, 13-16). Den Hebreo 8:6, e "mihó promesanan" ta papiando tokante di diferente tipo di promesanan. E aliansa entre Dios i Israel tabata un interkambio formal di promesanan entre Dios i Israel. Dios a tuma e inisiativa i a libra Israel for di Egipto i a primintí pa hiba nan na e Tera Primintí.

Kompará Éksodo 24:1-8 i Hebreo 10:5-10. Kiko ta e similaridatnan i diferensiana entre e dos promesanan akí?

E aliansa entre Dios i Israel a wòrdu ratifiká ku sanger. E sanger akí tabata wòrdu di sprenghu tantu riba e altar, ku tabata representá Dios, i riba e diesdos pilánan, ku tabata representá e pueblo. E pueblo di Israel a primintí di obedesé tur loke Señor a bisa. Esei tabata e promesa divino i ta wòrdu rekerí di nos mientras nos ta drenta un aliansa ku Dios.

"E kondishon di bida eterno awor ta simplemente loke e tabata semper, simplemente loke e tabata den Paraíso promé ku e kaída di nos promé mayoman, perfekto obedensia na e lei di Dios, perfekto hustisia. Si bida eterno lo a wòrdu duná riba kualkier kondishon fuera di esaki, e ora ei e felisidat di henter e universo lo a wòrdu poní na peliger. E kaminda lo ta habrí pa piká, ku tur su doló i miseria, pa wòrdu inmortalisa."-Ellen G. White, Steps to Christ, p. 62.

Dios ta satisfasé e demandanan apsoluto di e aliansa nobo pa nos pasobra El a duna Su propio Yu pa bini i biba un bida perfekto pa asina ku e promesanan di e aliansa por wòrdu kumplí den djE, i e ora ei ofresé na nos, pa medio di fe den Hesus. Hesus Su obedensia ta garantisá e promesanan di e aliansa (Heb 7:22). E ta rekerí ku Dios ta dun'E e bendishonnan di e aliansa, ku ta wòrdu duná na nos. siguramente, esnan ku ta ' den Kristu" lo disfrutá di e promesanan ei kunE. Na di dos lugá, Dios ta duna nos Su Spiritu Santu pa empoderá nos pa kumpli ku Su lei.

Kristu a satisfasé e demandanan di e aliansa; pesei, no tin duda den e kumplimentu di Dios Su promesanan na nos. Kon esakí ta yuda bo komprondé e nifikashon di 2 Korintionan 1:20-22? Ki speransa maravioso por wòrdu hañá akínan pa nos?

E Aliansa Nobo A Resolvé e Problema di e Kurason

djaweps, 17-02-2022

Kompará e promesanan di e aliansa nobo di Jeremias 31:33 i Ezekiel 36;26, 27. Di ki manera nan ta relashoná ku otro?

E promé dokumento di e aliansa a wòrdu skirbí pa Dios riba tablanan di piedra i a wòrdu depositá den e arka di e aliansa komo un testigu importante di Dios Su aliansa ku Su pueblo (Eks. 31:18, Deut. 10:1-4). Sinembargo, dokumentonan skirbí den piedra por wòrdu kibrá; i skròlnan, manera Jeremias a eksperensiá, por wòrdu kòrtá i kimá (Jer. 36:23).

Pero Dios awor lo skirbi Su lei den e kurason di e hendenan. E kurason ta referí na e mente, e órgano di memoria i komprondementu (Jer. 3:15, Deut. 29:4), i specialmente kaminda desishonnan konsiente ta wòrdu tumá (Jer. 3:10, Jer. 29:13).

E promesa akí no a simplemente sigurá aksesu na i konosementu di e lei pa tur hende. Tambe, mas importante ainda, e tabata pa trese un kambio den e kurason di e nashon. E problema di Israel tabata ku nan piká tabata grabá "ku un pen di heru," "ku un punta di djamanta ... riba e tabla di nan kurason" (Jer. 17:1, Beibel Santu). Nan tabatin un kurason duru (Jer. 13:10, Jer. 23:17); p'esei, tabata imposibel pa nan por hasi loke ta korekto (Jer. 13: 23).

Jeremias no a anunsiá un kambio di e lei, pasobra e problema di Israel no tabata e lei pero e kurason. Dios tabata ke pa Israel su fieldat por ta un kontesta yen di gratitut na loke El a hasi pa nan; pues, El a duna e Dies Mandamentunan na nan ku un prólogo históriko, ekspresando Su amor i kuido pa nan (Eks. 20:1, 2). Dios tabata ke pa Israel por obedesé Su leinan manera un rekonosimentu di ku E tabata ke lo mihó pa nan, un bèrdat revelá den nan gran liberashon for di Egipto. Nan obedensia lo mester tabata un ekspreshon di gratitut, un manifestashon di e realidat di nan relashon.

Meskos ta bèrdat pa nos awe. Hesus Su amor i kuido den muri pa nos ta un prólogo di e aliansa nobo (Lukas 22:20). Bèrdadero obedensia ta bini for di kurason komo un ekspreshon di amor (Mat. 22:34-40). E amor akí ta e marka ku ta distinguí e presensia di e Spiritu Santu den bida di e kreyente. Dios ta basha Su amor riba nos pa medio di Su Spiritu Santu (Rom. 5:5), kual ta wòrdu ekspresá den amor (Gal. 5:22).

Si Israel antiguo mester a stima Dios, asta sin e komprondementu di Kristu Su morto, di kon nos lo no tin ku stima Dios aún mas tantu ku nan? Kon obedensia ta hasi e realidat di e amor ei manifestá.

Mas Estudio:

djabinne, 18-02-2022

"Si nos kurason wòrdu renobá den e semehansa di Dios, si e amor divino wòrdu implantá den nos alma, e lei di Dios lo no wòrdu ehekutá den nos bida? Ora e prinsipio di amor wòrdu implantá den e kurason, ora hende wòrdu renobá segun e imagen di Esun ku a kre'é, e promesa di aliansa nobo ta wòrdu kumplí, 'lo Mi pone Mi leinan riba nan kurason, i den nan mente lo Mi skirbi nan.'" Hebreo 10:16. I si e lei wòrdu skirbí den e kurason, lo e no forma e bida? Obedensia -e servisio i aliansa di amor- ta e bèrdadero señal di disipulado. Peus Skritura ta bisa, 'Esaki ta e amor di Dios, ku nos ta warda Su mandamentunan.' 'Esun ku bisa: 'Mi konos'E,' i no ta warda Su mandamentunan, ta un gañadó, i e bèrdat no ta den djé.' 1 Huan 5:4; 2:4. Na lugá di los hende for di obedensia, ta fe, i fe so, por laga nos tuma parti den e grasia di Kristu, kual ta laga nos por duna obedensia....

"Mas serka bo bini serka Hesus, ku mas defekto lo bo aparentá den bo propio bista; pasobra bo bista lo ta mas limpi, i bo imperfekshonnan lo wòrdu mirá den kontrasté amplio i distinto na Su naturalesa perfekto. Esaki ta evidensia di ku Satanás su mentiranan a pèrde nan poder; ku e influensia bibu di e Spiritu di Dios ta lantando bo.

"Un amor profundo pa Hesus no por biba den un kurason ku no ta realisá su propio pekaminosidat. E alma ku wòrdu transformá pa e grasia di Kristu lo admirá Su karakter divino; pero si nos no mira nos propio deformidat moral, ta evidensia sin fayó ku nos no tabatin un bista di e beyesa i ekselensia di Kristu."-Ellen G. White, Steps to Christ, pp. 60, 64, 65.

Preguntanan pa Diskushon:

1. Pensa riba e sitanan di Ellen G. White ariba. Kiko e echo di ku mas serka nos bini na Kristu, mas pekaminoso nos lo aparentá den nos propio bista ta bisa nos tokante di kon nos no mester laga e realisashon di nos propio defektonan laga nos entregá fe den desesperashon?
2. Meditá mas riba e idea di ku e lei ta wòrdu skirbí den nos kurason. Kiko esei ta nifiká pa e bida spiritual di un kristian? Kon komprondé i eksperensia e bèrdat akí por yuda nos evitá e tipo di "obedensia" ku realmente ta solamente legalismo, obedensia ku a wòrdu yamá "obranan morto" (Heb. 9:14)?